

BOARAN MUNNJE BUORRE

SON VÁZZÁ MU MEATTÁ EANET GO EARÁID, dollesta mu oalgái, sallu ja rápmo man čeahppi mun lean barggus. «Don leat buorre ovdagovva eará bargoskihpáriidda», «don movttiidahtát min buohkaid barggus», ja dat vearrámus «don leat dego Ipmila buhttáseamos engel vižžon almmis dán bargui mu lusa», dadjá munnje go vázzá meattá.

Jo, heive bures. Mun lean nuorra nieida gii čuoččun dás hoteallas ja basan lihtiid ja 50-jahkásaš bargoskibir lea ráhkásnuvvan munnje. Dahje son lea geavaheamen mu su gollegoaivun , roggat su maŋimuš boaresbárdnehimuid mat soitet bohciidit eatnan vuolde jus gullá muhtin nieidda huradeamen su «čáppa» luođi.

In dieđe lean go mun oassin su ártegis rituálas, maid ferte čađahit dahje mii lea maŋimuš vejolašvuohta šaddat nuorran fas ja viimmat fidnet juoidá. Son lea okta hoavddain, ja mun balan massimis barggu jos dadjalan dahje dieđihan ahte dan maid son geahččala lea munnje unohas.

Ovttá vuossárgga bođii son mojunjálmmiid mu lusa ja dollestii mu olgeš oalgái: «Hei fávrui! Maid don bearjadaga áiggut?» Nu mo dábálaččat láven de moddjen ja vástidan hui čábbát ahte mun áiggun geahččat TV ja vuoiŋnastit, ja jearan dan seammá sus. «Mus lea riegádanbeaivi bearjadaga ja jurddašin bovdet du ávvudit dan muinna gávppoga fiidnámus boradanbáikkis».

Oh, man somá. Hoavda bovde mu su riegádanbeaivvedoaluide, šaddá somá go olles bargosadji ja eará olbmot maid deaivvadit olggobealde bargoáiggi. Soaittán beassat oahpásmuvvat su eamidin ja mánáiguin, ja sus soaitá gánda velá mu agis. Son jávkkihii muhtin eará bargiid lusa veahkehit sin gurput bruvsaohhtaliid galm্মihanskáhpíi.

Duorastaga bargobeavi lei nohkamin, son vázzá fas meattá, ja dadjala su «James Bond/Badboy» – láhttestagain ja jienain: «Muitte fal coggat dan oanehis vuolppu mii lea hui baski, vai beasan oaidnit veahá maid ge. Ja dan vilges silke-soajehisbáiddi mas lea measta jo menddo galjes čeabi, mii lei du ovddit Facebook profiila-govas. Ihttin mun ja don, ja ruksesviidna. Galgga go dingot hoteallalanja maid?» Mii diet lea olbmuid? jurddašin ja ohcalin su birra dieđuid internehtas. Son lea boaresbárdni, ii makkárga čáppa gánda dahje šiega eamit sus ja bearjadaga lei sus 60 jagi riegádanbeavi, maid muinna áiggui ávvudit hotealla seanggas vilges gávnniid siste. Eará bargoskihpárat eai lean bovdejuvvon daid doaluide. 60 jagi lea son eallán, ja mun lean dat lagamus mii sus lea, in mun sáhttán dušše botket munno plánaid ja bilidit su stuorra ávvodoaluid, dušše danne go in lean bissehan su dollestemiin mu eksklusiiva oalggi.

Bearjadaga maŋŋá barggu coggalin dan sexy silkebáiddi ja dollestin su oalgái ja sávven lihku. Válđen mu 15-jahkásaš kránnjágánda neaktit mu irggi olles ija, ja son háleštii mu hoavddain hirbmat olu. Dan rájes ii lean oktage 60-jahkásaš dollestemen mu oalgái dahje njávkame mu muođuid, ja buriin oamedovdduin bassen duolva lihtiid. Muhto mu hoavda gal liikká ii vuollánan, go son álggii dollestit dan ođđa 16 jahkásačča oalgái. Ja go rávvejin nieidda ahte ii dárbbáš dohkkehit dan, de lean fáhkka gáđašteamen su. Dan rájes lean láhtten olbmuiguin dan láhkai dego livččen plánemin iežan 60 jagi riegádanbeavi. Ii leat álo nu mo mii jáhkkít ja nuorra nieida sáhttá leat gievrrat ja gávvilat go orru.

BARGOBIHTÁT

1. Mii lea *mun*-olbmo hástalus dán mitalusas?
2. Mo son čoavdá hástalusa?
4. Digaštallet ceahkis, sáhttet go eará vuogit čoavdit hástalusa?
5. Illustrerejehket mitalusa.
6. Sámit dávjá gávvilvuodain čovdet hástalusaid.
Mo mii dan oaidnit dás?